

# Puasa, al-Quran syafaat di akhirat

Antara keajaiban terbesar agama Islam ialah adanya sebuah kitab suci terkandung kalam Ilahi menjadi petunjuk kepada setiap yang beriman dengannya. Kitab suci iaitu al-Quran telah menjaga peradaban hidup umat Islam mengikut landasan hukum yang sempurna.

Di sebalik Ramadan yang bertandang saban tahun dengan seribu janji pengampunan buat insan mengambil manfaat, turunnya kitab suci al-Quran di bulan sama mengubah hidup manusia dari kufur kepada cahaya.

Setiap mukmin perlu mengambil kesempatan Ramadan mengakrabkan diri dengan al-Quran. Tidak cukup membaca, al-Quran perlu difahami dan dihayati supaya pengamalan selaras dengan pesanan Allah SWT, kerana al-Quran jugalah akan memberi syafaat di akhirat.

Rasulullah SAW bersabda: "Dari Abdullah bin Amru, sesungguhnya Rasulullah SAW bersabda: Bahawa puasa dan al-Quran itu meminta syafaat kepada Allah SWT untuk seseorang hambanya pada hari kiamat. Berkata puasa: Ya Allah, aku telah menahan daripada makan dan minum pada siang hari, maka jadikanlah aku syafaat kepadanya. Dan berkata al-Quran:

Ya Allah, aku telah menahannya daripada tidur (kerana membaca al-Quran) pada malam hari, maka jadikanlah aku syafaat kepadanya, maka Allah memberi syafaat kepadanya dengan sebab permohonan keduanya." (Riwayat Imam Ahmad)

## Sarat panduan

Al-Quran sarat dengan panduan dan pengajaran untuk setiap insan yang inginkan pedoman hidup. Akidah dan syariah mengajar manusia cara melandasi dunia sebaiknya sebelum tiba di akhirat.

Kisah azab dan nikmat memberi peringatan buat kita berfikir, dunia adalah fana dan tidak menguntungkan apa-apa melainkan nikmat yang sementara.

Allah SWT berfirman: "Sesungguhnya telah datang kepada kamu cahaya kebenaran (Nabi Muhammad) dari Allah, dan sebuah kitab al-Quran yang jelas nyata keterangannya, dengan al-Quran itu Allah menunjukkan jalan keselamatan serta

kesejahteraan kepada sesiapa yang mengikut keredaan-Nya, dan dengannya Tuhan keluarkan mereka dari gelap gelita (kufur) kepada cahaya (iman) terang benderang dengan izin-Nya dan dengannya juga Tuhan menunjukkan mereka ke jalan yang lurus." (Surah al-Ma'idah, ayat 15-16)

## Amalan rutin bibir

Namun, dunia jugalah yang menjayakan kehidupan di akhirat kelak jika kita mampu melaluinya dengan perintah dan suruhan al-Quran. Sebab itulah membaca al-Quran menjadi rutin bibir yang melazimi sunnah Rasulullah SAW, supaya mendapat syafaat di akhirat kelak.

Diriwayatkan Imam Muslim, Rasulullah SAW bersabda: "Dari Abu Amamah Al-Bahali berkata: Aku mendengar Rasulullah SAW bersabda: Bacalah oleh kamu al-Quran kerana sesungguhnya al-Quran itu akan datang pada hari kiamat memberi syafaat (pertolongan) kepada pembacanya."

“  
Bacalah oleh kamu  
al-Quran kerana  
sesungguhnya  
al-Quran itu akan  
datang pada hari  
kiamat memberi  
syafaat (pertolongan)  
kepada pembacanya”

Sebab itulah Rasulullah bersungguh-sungguh mengerjakan amal ibadat di sepuluh terakhir Ramadan, kerana lailatulqadar, iaitu malam turunnya al-Quran akan muncul di antara hari-hari itu.

Ramai kalangan kita tidak cuba mengambil kesempatan di sebalik keistimewaan ini kerana tidak tahu betapa besarnya pertolongan al-Quran kepada setiap manusia beriman. Sedangkan Allah SWT telah meyakinkan hanya al-Quran satu-satunya kitab mengutuskan nasihat dari-Nya.

Allah SWT berfirman: "Wahai umat manusia! Sesungguhnya telah datang kepada kamu al-Quran yang menjadi nasihat pengajaran dari Tuhan kamu, dan yang menjadi penawar bagi penyakit batin yang ada dalam dada kamu, dan juga menjadi hadiah petunjuk untuk keselamatan, serta membawa rahmat bagi orang yang beriman." (Surah Yunus, ayat 57)

Jelas sekali al-Quran bukan sekadar membawa petunjuk kepada manusia yang jahil, tetapi lengkap dengan garis panduan sebuah kehidupan. Bukan senang menyintai al-Quran melainkan kita memahami seluruh hidup tidak lengkap melainkan kita berpasangan dengan al-Quran.



➔  
**NIK SALIDA  
SUHAILA**

**Pensyarah Kanan**  
Fakulti Syariah dan  
Undang-Undang  
Universiti Sains  
Islam Malaysia